

GRISCHUN

Per dapli controllas en il cumbat cunter la mafia

La deputada da Cuira Sandra Maissen (Center) ha inoltrà en il parlament grischun ina moziun a la Regenza cun il titel «Cumbat consequent cunter la criminalitad organisada en il Grischun». Sandra Maissen ed ils 38 consutsegnaders da differentas partidas incumbenseschan la Regenza da prender ina retscha da mesiras.

KEYSTONE-SDA/FMR

RG

Las mesiras proponidas da las parlamentarias e dals parlamentaris èn repartidas en quatter puncts per garantir ch'il cumbat cunter la criminalitad organisada «mainia ad in agir liant verifitgabel e ch'i na restia betg tar decleraziuns d'intenziun ed inscunters», hai num en l'incumbensa. Tranter las pretensiuns sa chatra era quella d'utilisar maximalmain las pussaivladads giuridicas existentas areguard la pretensiun d'in extract dal register penal per burgais da terzs stadis. Pir l'emna passada ha il cusseglier guvernativ Peter Peyer (PS) declerà envers Keystone-SDA che l'Uffizi chantunal da migraziun e da dretg civil examineschia, sch'ins possia introducir ina soluziun regiunala per in extract dal register penal. Concret: En regiuns nua che la situaziun è ristgada pudess en l'avegnir vegnir pretendì in extract. La mesira saja, tenor Peter Peyer, en la fasa d'analisa.

Pretendi dapli controllas

Las cusseglieras ed ils cussegliers pretendan da la Regenza era d'installar ina nova procedura lianta. Avant che conceder u prolungar ina permissiun da dimora sto il Chantun examinar sistematicamain, sch'igl èn avant maun en auters chantuns proceduras dal dretg d'esters pendentas u terminadas, refusaziuns da permissiuns, proceduras da revocaziun u infurmaziuns relevantas per la segirezza. Questas datas che derivan dals sistems d'infurmaziun da la Confederaziun ston vegnir documentadas ed integradas en il process da decisiun.

Las deputadas ed ils deputads dal Cussegl grond pretendan plinavant d'introducir in sistem da controlla per societads da domicil sco era per interpresas che han «in'auta ristga per lavada da daners u criminalitad organisada». Questa mesira duai vegnir realisada en collavuraziun cun differentes uffizis chantunals, la Polizia chantunala dal Grischun, la procura publica, las vischnancas, locaturs, fiduziarias e notars. Sper il chattar firmas fictivas duain era las persunas cun dretg economic vegnir identitfigadas ed abus duain vegnir sancziunads, «e quai permanentamain».

La Regenza vegn ultra da quai incumbensada d'examinar l'installaziun d'in post d'annunzia central per cas da suspect da firmas fictivas. Ella sto ussa prender posiziun davart l'incumbensa e quella vegn silsuenter en il parlament grischun.

Approvà moziuns en il Parlament federal

Areguard la criminalitad organisada è era sa fatg naziunalmain insatge. L'emna passada han il Cussegl naziunal ed il Cussegl dals chantuns approvà a Berna duas moziuns da la PPS. Quellas pretendevan che persunas estras na duain en l'avegnir betg pli survegner ina permissiun da dimora, sch'ellas èn vegnidas sentenziadas en il passà pervi da grevs malfatgs – er a l'exteriur.



Cusseglier guvernativ Peter Peyer sto sa fatschentar cun in'incumbensa or dal parlament grischun che pretenda differentas mesiras cunter la criminalitad organisada.

FOTO KEYSTONE/GIAN EHRENZELLER

TAVAU

Manevrà in vehichel en ina butia d'uras

La notg sin glindesdi han in u plirs laders manevrà in vehichel en ina butia d'uras a Tavau Plaz. La Polizia chantunala ha confermà ina novitad correspondent da dal portal da novitads suedostschweiz.ch. Tenor quella notizia in ils delinquent nunenconuscents (u il delinquent singul) charrads cun il vehichel en l'entrada da la butia d'uras. La polizia è vegnida alarmada quella notg a las 3.00. E la polizia è, tenor il pledader da medias Markus Walser, anc adina en tschertga da laders ed auto. Ch'il vehichel saja probabel donnegià ferm. Davart la summa da delict n'ha Walser anc betg pudì far in'indicaziun envers l'agentura Keystone-SDA. (sda/fmr)

FESTA FEDERALE DA TIR 2026



L'occorrenza da tir naziunala en il Grischun – a Cuira ed ora en las regiuns – è in success cumplain.



FOTOS SOMEDIA E GION NUTEGN STGIER

«Turissem e gastronomia profiteschan da la festa»

Tiraduras e tiradurs tut cuntents, stupenta lavur dals organisaturs locals e participantas e participants ch'han tutgà precis. Quai la bilantscha da fin ussa da la Festa federala da tir 2026 en il Grischun.

GION NUTEGN STGIER/FMR

RG

Dapi ils 5 da zercladur 2026 hai num a Cuira ed en 19 stans da tir externs «Fieu liber». La 59avla Festa federala da tir è gia ida in bun toc enavant. La pli gronda occorrenza da sport da quest onn en Svizra dura anc fin ils 5 da fanadur 2026.

Secretari general e la persuna instancabla da questa occorrenza da tir naziunala è Carl Frischknecht. El è fatschentà minga di a Cuira en il center da festa u sin visita en in dals 19 stans externs, nua ch'i vegn era sajettà. La FMR ha inscuntrà l'um da Tumeigl ed anteriur president da l'Associaziun grischuna da tir a Cuira e fatg cun el ina bilantscha intermediara da la Festa federala da tir actuala.

Fitg blers resuns positivs

L'entschatta dal discurs di Carl Frischknecht: «La festa na marscha betg mo bain, mabain fitg bain.» Il secretari general accentuescha ch'i fetschia grond plaschair da survegnir minga di nundumbraivels resuns positivs da tiraduras e tiradurs e da numerusas societads da tir. Quests plaschaivels resuns cumprovan tge lavur eccellente che vegn prestada a Cuira en il center principal da l'occorrenza da tir naziunala e surtut er en ils ulteriurs 19 stans da tir. A Cuira vegni sajettà l'entira emna auter che la mesemna, en ils ulteriurs stans da venderdi fin dumengia, sco per exempel er a Crappa Naira ed a Rona. Carl Frischknecht suttastritga: «Blers da quests resuns positivs



In um ferm occupà: Carl Frischknecht, il secretari general da la Festa federala da tir 2026.

survegn igl comité d'organisaziun per la fitg buna lavur dals organisaturs locals, era d'in stan da tir pli pitschen.»

I vegnan cumprads ulteriurs stetgs

Sco ch'il secretari general da la Festa federala da tir di, saja l'occorrenza en tuttas modas e manieras in grond success fin uss. En media haja ina tiradura u in tiradur sajettà ses stetgs sin la distanza da 300 meters. Carl Frischknecht menziuna ch'il dumber da sajets per participanta e participant saja tar 70 tocs. El di: «Nus avain gia da pustar suenter munizium.» La raschun è che bleras tiraduras e tiradurs cumpran ulteriurs stetgs u tiran vasaquants culps supplementars, uschenumnads «Nachdoppel» per

megliurar il resultat cuntanschì avant. Fin la fin da l'occorrenza da tir naziunala vegn il dumber da muniziun ad esser tar 2,7 milliuns patronas, manegia Carl Frischknecht.

En l'avegnir be pli electronic e decentral

Bler laud drizza Carl Frischknecht a las 5000 gidantras e gidantras ch'han contribuì fitg bler che la 59avla Festa federala da tir è reussida. Plaschair ha el surtut ch'igl è stà pussaivel da chattar tants «voluntaris», era nundumbraivlas persunas che n'èn betg uschè colliadas cun il sport da tir. Per il secretari general è quai in mussament ch'il sport da tir ha anc adina ina gronda muntada tar la populaziun. Positiva è la festa tenor el er ord vista turistica. El di: «Turissem e gastronomia profiteschan prest il pi fitg da la festa.»

Era per la registraziun digitala dals resultats n'hajan ins fin ussa per l'emprima giada strusch gi problems, uschia Carl Frischknecht. En l'avegnir vegn ins a realisar occurrenzas da tir pli grondas, sco chantunals, ma era naziunalas, mo pli da maniera electronica ed en sasez decentral. I saja sa cumprovà fitg d'organisar l'occorrenza da tir en questa furma. Sco che Carl Frischknecht – ch'è sez in tiradur d'elita – menziuna, saja la Festa federala da tir federala era quai che pertutga ils resultats da sajettar dals tiradurs e da las tiraduras ina grondiusa chaussa. I vegnan cuntanschids ferm resultats. Plaschair ha l'um da Tumeigl era dal tempel dals regals cun premis en ina valita totala da 450 000 francs.